

**ODLUKA O IZMJENAMA I DOPUNAMA ODLUKE O UVJETIMA I POSTUPKU OSTVARIVANJA
PRAVA NA OSLOBAĐANJE OD PLAĆANJA UVOZNIH I IZVOZNIH DAŽBINA**

Član 1.

U Odluci o uvjetima i postupku ostvarivanja prava na oslobađanje od plaćanja uvoznih i izvoznih dažbina (Službeni glasnik BiH, broj: 24/18) u članu 6. dodaje se novi stav 2. koji glasi:
„Od plaćanja uvoznih dažbina oslobađaju se i rezervni dijelovi za opremu iz stava 1. ovog člana.“

U istom članu, u stavu 2. koji postaje stav tri, riječi „Oprema puštena“ mijenjaju se riječima „Oprema i rezervni dijelovi pušteni“. U istom stavu, riječi „ne može“ mijenjaju se riječima „ne mogu“.

U istom članu, u stavu 3. koji postaje stav 4. riječi „Oprema puštena“ mijenjaju se riječima „Oprema i rezervni dijelovi pušteni“. U istom stavu, riječi „s kojom“ mijenjaju se riječima „s kojima“, riječ „podliježe“ mijenja se rječju „podliježu“.

Član 2.

U članu 7. u stavu 1. iza riječi „opremu“ dodaju se riječi „i rezervne dijelove“, iza riječi oprema dodaju se riječi „i rezervni dijelovi“.

U istom članu i stavu, u tački a), iza riječi „opremu“ dodaju se riječi „i rezervne dijelove“. Ostali dio teksta se nastavlja.

U istom članu i stavu, u tački b) iza riječi „opreme“ dodaju se riječi „i rezervnih dijelova“. Iza riječi „opremu“ dodaju se riječi „i rezervne dijelove“. Ostali dio teksta se nastavlja.

U istom članu i stavu, u tački c) iza riječi „oprema“ dodaju se riječi „i rezervni dijelovi“. Ostali dio teksta se nastavlja.

U istom članu i stavu, u tački d) iza riječi „opreme“ dodaju se riječi „i rezervnih dijelova“. Ostali dio teksta se nastavlja.

Član 3.

Ova odluka stupa na snagu osmog dana od dana objavljivanja u "Službenom glasniku BiH".

Obrazloženje

U Službenom glasniku BiH, broj: 24/18, od 17.04.2018. godine objavljena je Odluka o uvjetima i postupku ostvarivanja prava na oslobađanje od plaćanja uvoznih i izvoznih dažbina. Članom 6. navedene Odluke od plaćanja uvoznih dažbina oslobađa se oprema za proizvodnju koja se ne proizvodi u Bosni i Hercegovini, koja se uvozi za novu ili proširenje postojeće proizvodnje, modernizaciju proizvodnje, uvođenje nove odnosno osuvremenjenje postojeće proizvodne tehnologije, a kojom se obavlja neposredna proizvodna djelatnost.

S tim u vezi neophodno je izmijeniti član 6. Odluke na način da se od plaćanja uvoznih dažbina oslobode i rezervni dijelovi opreme, odnosno mašina iz stava 1., a razloge za to navest ćemo u nastavku.

Obzirom da je riječ o mašinama koje se ne proizvode u Bosni i Hercegovini i da se najveći broj dijelova za te mašine ne proizvodi u Bosni i Hercegovini, ili se ne mogu naći originalni dijelovi, treba primjeniti istu analogiju, odnosno ako se može mašina osloboditi od plaćanja uvoznih dažbina, može i rezervni dio. Proklamacija svih nosioca vlasti na svim nivoima je da se mora modernizovati proizvodnja i da se moraju unaprijediti tehnološki procesi u privredi. Naša predložena mjera je u skladu s tim.

Usvajanjem naše inicijative povećala bi se konkurentnost bh privrednika, povećao bi se izvoz, jer bi se moglo odgovoriti potrebama Evropskog tržišta. Ujedno bi došlo do povećanja ekonomskog rasta.

Eventualni gubitak u Bužetu koji bi mogao nastati zbog neubiranja uvoznih dažbina na rezervne dijelove višestruko bi se nadoknadio kroz naplatu PDV-a na proizvode i usluge.

Na kraju navodimo da je pojava korona virusa negativno utjecala na poslovanje i dovela do gašenja mnogih kompanija i otpuštanja radnika. Bosna i Hercegovina je jedina država u Evropi koja nije preduzela niti jednu mjeru na nacionalnom nivou kojom se pomaže privredi da prebrodi ekonomsku krizu. Shodno navedenom, molimo vas da razmotrite prijedlog da se uvoznih dažbina, pored opreme, oslobode i rezervni dijelovi, te na taj način date svoj doprinos rasterećenju bh privrede.